



Կ Ա Ր Գ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ 2021 ԹՎԱԿԱՆԻ ՍԵՊՏԵՄԲԵՐԻ 12-Ի ԸՆԴՀԱՆՈՒՐ ԺՈՂՈՎԻ ԿԱԶՄԱԿԵՐՊՄԱՆ ԵՎ ԱՆՑԿԱՑՄԱՆ ԳՈՐԾԸՆԹԱՑՈՒՄ ՕԺԱՆԴԱԿՈՒԹՅՈՒՆ ՑՈՒՑԱԲԵՐԵԼՈՒ ՄԱՍԻՆ

1. ԸՆԴՀԱՆՈՒՐ ԴՐՈՒՅԹՆԵՐ

1.1. Սույն կարգը (**այսուհետ նաև Կարգ**) սահմանում է Հայաստանի Հանրապետության փաստաբանների պալատի (**այսուհետ՝ Պալատ**) 2021 **թվականի սեպտեմբերի 12-ի** ընդհանուր ժողովի (**այսուհետ՝ Ընդհանուր ժողով**) կազմակերպման և անցկացման գործընթացում Պալատի օժանդակության պայմանները և ընթացակարգը:

1.2. Պալատի նախագահի թեկնածուները (**այսուհետ՝ Թեկնածու**) Կարգով նախատեսված Պալատի միջոցներից օգտվում են հավասար պայմաններով:

1.3. Կարգը չի կարող խտրական կիրառվել փաստաբանների, այդ թվում՝ Թեկնածուների նկատմամբ:

1.4. Կարգի կիրառման նկատմամբ հսկողությունն իրականացնում է Պալատի աշխատակազմի ղեկավարը (**այսուհետ՝ Պատասխանատու**):

2. ՊԱԼԱՏԻ ԿԱՅՔԷՋԻՑ ՕԳՏՎԵԼՈՒ ԿԱՐԳԸ ԵՎ ՊԱՅՄԱՆՆԵՐԸ

2.1. Ընդհանուր ժողովի վերաբերյալ բոլոր տեղեկությունները (հայտարարություններ, լուրեր, որոշումներ, արձանագրություններ և այլ նյութեր) հրապարակվում են Պալատի կայքէջում առկա համապատասխան բաժիններում:

2.2. Պալատի կանոնադրության 13.6 կետին համապատասխան Պալատի կայքէջում հրապարակելու համար Թեկնածուներից յուրաքանչյուրը կարող է առավելագույնը երեք անգամ ներկայացնել իր քարոզչական նյութը այն պայմանով, որ՝

- նյութը պետք է պարունակի թեկնածուի ստորագրությունը.
- նյութը չի կարող պարունակել վիրավորական արտահայտություններ կամ զրպարտչական տեղեկություններ.
- նյութը պետք է ներկայացվի նաև էլեկտրոնային տարբերակով

(էլեկտրոնային փոստով կամ կրիչով):

2.3. Կարգի 2.2 կետում նշված նյութը Պալատի կայքէջում հրապարակելու հարցը որոշում է Պատասխանատուն՝ նյութը ստանալուց հետո մեկ աշխատանքային օրվա ընթացքում: Եթե Թեկնածուի՝ Պալատի կայքէջում նյութ հրապարակելու հայտը (դիմումը) չի համապատասխանում Կարգի 2.2 կետում նշված որևէ պայմանի, ապա Պատասխանատուն կարող է մերժել հայտը՝ գրավոր կարգով պատճառաբանելով մերժումը:

2.4. Թեկնածուն Պատասխանատուի մերժման հարցով կարող է դիմել Պալատի հաշվիչ հանձնաժողովին: Պալատի հաշվիչ հանձնաժողովի որոշումը՝ նյութի հրապարակումն ապահովելու վերաբերյալ, հիմք է նյութն անհապաղ կայքէջում հրապարակելու համար:

2.5. Պալատը չի օժանդակելու թեկնածուներին կամ փաստաբաններին նախընտրական քարոզչության ժամանակահատվածում փաստաբաններին էլեկտրոնային փոստով գրություններ, ուղերձներ կամ այլ հայտարարություններ ուղարկելու հարցում, բացառությամբ սույն կարգի 5.3 կետում նշված դեպքի:

3. ՊԱԼԱՏԻ ԴԱԿԼԻՃԻՑ ՕԳՏՎԵԼՈՒ ԿԱՐԳԸ ԵՎ ՊԱՅՄԱՆՆԵՐԸ

3.1. Պալատը հնարավորություն է ստեղծում Թեկնածուին առավելագույնը 3 (երեք) ժամով անվճար օգտվել Պալատի՝ ք.Երևան, Զաքիյան 7-2 հասցեի 4-րդ հարկում գտնվող դահլիճից՝ հետևյալ կարգով.

- մինչև 2021թ. օգոստոսի 25-ը թեկնածուն պետք է գրավոր ներկայացնի հայտ՝ նշելով իր նախընտրած օրը և ժամը, ինչպես նաև հանդիպման ակնկալվող ողջամիտ տևողությունը, որը չի կարող գերազանցել 3 (երեք) ժամը.
- Պատասխանատուն Թեկնածուներից ստացված հայտերի հիման վրա մինչև 2021թ. օգոստոսի 26-ը (ներառյալ) որոշում է դահլիճի զբաղվածության գրաֆիկը և հրապարակում է այն Պալատի կայքէջում:

3.2. Այն դեպքում, երբ Թեկնածուների՝ դահլիճից օգտվելու հայտերում նշված օրերը և ժամերը մասամբ կամ ամբողջությամբ համընկնում են, ապա Պատասխանատուն՝ հաշվի առնելով արդարության ընդհանուր սկզբունքը ինքնուրույն է որոշում Թեկնածուների կողմից դահլիճից օգտվելու ժամանակացույցը:

3.3. Սույն կարգի 3.1 կետով նախատեսված կարգով դահլիճից յուրաքանչյուր թեկնածու կարող է օգտվել առավելագույնը երկու անգամ:

4. ՊԱԼԱՏԻ ՄԱՐԶԱՅԻՆ ՏԱՐԱԾՔՆԵՐԻՑ ՕԳՏՎԵԼՈՒ ԿԱՐԳԸ ԵՎ ՊԱՅՄԱՆՆԵՐԸ

4.1. Պալատը հնարավորություն է ստեղծում Թեկնածուին առավելագույնը 3 (երեք) ժամով անվճար օգտվել մարզերում Պալատի տիրապետության տակ գտնվող տարածքից (**այսուհետ՝ մարզում Պալատի տարածք**)՝ հետևյալ կարգով.

- մինչև 2021թ. օգոստոսի 25-ը Թեկնածուն պետք է ներկայացնի հայտ՝ նշելով մարզի (քաղաքի) (մարզերի, քաղաքների) անվանումը, իր

նախընտրած օրը և ժամը, ինչպես նաև հանդիպման ակնկալվող ողջամիտ տևողությունը, որը չի կարող գերազանցել 3 (երեք) ժամը:

- Պատասխանատուն Թեկնածուներից ստացված հայտերի հիման վրա մինչև 2021թ. օգոստոսի 26-ը (ներառյալ) որոշում է մարզերում Պալատի տարածքների գրադվածության գրաֆիկը (ըստ թեկնածուների և/կամ ըստ մարզերի) և հրապարակում է այն Պալատի կայքէջում:

4.2. Այն դեպքում, երբ Թեկնածուների՝ մարզերում Պալատի տարածքներից օգտվելու հայտերում նշված օրերը և ժամերը մասամբ կամ ամբողջությամբ համընկնում են, ապա Պատասխանատուն՝ հաշվի առնելով արդարության ընդհանուր սկզբունքը ինքնուրույն է որոշում Թեկնածուների կողմից մարզերում Պալատի տարածքներից օգտվելու ժամանակացույցը:

4.3. Սույն կարգի 4.1 կետով նախատեսված կարգով Պալատի՝ մարզում տարածքից յուրաքանչյուր թեկնածու կարող է օգտվել մեկ անգամ՝ յուրաքանչյուր մարզում Պալատի տարածքից:

5. ԹԵԿՆԱԾՈՒՆԵՐԻ ՀԱՄԱՐ ԲԱՆԱՎԵՃ ԿԱՍ ՔՆՆԱՐԿՈՒՄ ԱՆՑԿԱՑՆԵԼՈՒ ՆՊԱՏԱԿՈՎ ԴԱՎԼԻՃ ԱՊԱՀՈՎԵԼՈՒ ԿԱՐԳԸ ԵՎ ՊԱՅՄԱՆՆԵՐԸ

5.1. Առնվազն երկու Թեկնածուի գրավոր հայտի (հայտերի) դեպքում, Պալատը՝ բոլոր թեկնածուների համար բանավեճ կամ քննարկում անցկացնելու նպատակով, մեկ անգամ կարող է ապահովել Պալատի գտնվելու վայրից դուրս դահլիճի վարձակալումը:

5.2. Բանավեճի կամ քննարկման անցկացման նպատակով վարձակալած դահլիճում կազմակերպչական գործողություններն ապահովելու է Պալատը:

5.3. Բանավեճի կամ քննարկման համար նախատեսված վայրի և ժամանակի, ինչպես նաև այլ պայմանների վերաբերյալ հայտարարությունը նախապես (առնվազն մեկ օր առաջ) տեղադրվում է Պալատի կայքէջում, ինչպես նաև կարող է ուղարկվել փաստաբաններին՝ էլեկտրոնային փոստի միջոցով:

6. ՄԱՐԶԵՐԻ ՓԱՏՏԱԲԱՆՆԵՐԻՆ ՏՐԱՆՍՊՈՐՏԱՅԻՆ ՄԻՋՈՑՈՎ ԱՊԱՀՈՎԵԼՈՒ ԿԱՐԳԸ ԵՎ ՊԱՅՄԱՆՆԵՐԸ

6.1. Մարզերի փաստաբանների՝ Ընդհանուր ժողովին մասնակցելու իրավունքն իրացնելու համար, Պալատն ապահովում է Հայաստանի Հանրապետության բոլոր մարզերից Երևան քաղաք (քվեարկության անցկացման վայր) տեղափոխումը և հետադարձը դեպի մեկնման վայր՝ հետևյալ կարգով և պայմաններով՝

- 1) Տրանսպորտային միջոցը կամ միջոցներն (**այսուհետ՝ Տրանսպորտային միջոց**) ապահովում է Պատասխանատուն՝ հաշվի առնելով նաև տվյալ մարզի մարզային համակարգողի առաջարկը՝ փաստաբանների քանակի, երթուղու և մեկնման ժամի վերաբերյալ:
- 2) Տրանսպորտային միջոցը պետք է երթուղին սկսի նախապես հայտարարված ժամին և վայրից:
- 3) Տրանսպորտային միջոցից կարող են օգտվել տվյալ մարզում գտնվող

բոլոր փաստաբանները.

- 4) Ըստ մարզերի՝ Տրանսպորտային միջոցների երթուղիների, մեկնման ժամի և վայրի մասին տեղեկությունները մինչև 2021 թվականի սեպտեմբերի 10-ը պետք է հրապարակվեն Պալատի կայքէջում:

6.2. Պատասխանատուն կամ մարզային համակարգողը պարտավոր է ապահովել, որպեսզի Տրանսպորտային միջոցում փակցվի՝ «Քարոզչությունն արգելվում է» հիշեցում-թերթիկ կամ քարոզչությունն արգելված լինելու մասին իրազեկել Տրանսպորտային միջոցից օգտվող փաստաբաններին:

7. ԵԶՐԱՓՈՒԿ ԴՐՈՒՅԹՆԵՐ

7.1. Կարգն ուժի մեջ է մտնում 2021 թվականի օգոստոսի 5-ից և գործում է մինչև 2021 թվականի սեպտեմբերի 15-ը:

7.2. Հաշվիչ հանձնաժողովի պահանջով Կարգն ենթակա է փոփոխման: